

REPONSE DU PRESIDENT DU CONSEIL EXECUTIF

Objet : A ripressione pulitica : Fin'à quandu?

Vi ringraziu pè a vostra quistione. Sempre appena listessa quistione, l'affari ùn cambianu tantu, è sempre listessa risposta.

Primu puntu, l'emu sempre detta, a pensemu, è n'emu fattu a dimustrazione, a suluzione pulitica ch'è no bramemu deve piglià in contu a quistione di i prigiuneri pulitichi, di e seguite di ciò chì s'hè passatu in Corsica, a logica di cunflittu, si tratta per esempiu di e cunseguenze à u livellu di i soldi, l'amende, o i danni interessi. Emu cumbattutu insieme per fà vultà quelli chì sò stati cundannati inde l'affare di u Prefettu Erignac, emu luttatu insieme è cuntinuemu à luttà per ottene ghjustizia è verità inde l'affare d'Yvan Colonna, sò chì ùn hè ancu u casu, m'avete fattu parte è avete fattu parte à l'opinione publica corsa di a situazione di u vostru militante, Stefanu Ori, m'avete dumandatu di fà valè e vostre dumande, l'aghju fatta. Què hè u primu puntu.

Secondu puntu, nantu à l'affare di u FIJET, cum'è l'aviamu detta, aghju multiplicatu e dimarchje, A sapete, ste quistione anu vucazione à fà parte di e nostre discussione cù u Statu, di manera trasparente, cun tutti i naziunalisti ma dinù cun l'astri eletti, ch'ùn sò micca naziunalisti, è sapete dinù chì ind'u cuntestu attuale in Francia, ci vole à avanzà nant'à st'affare à passi misurati perchè o sinnò ci seranu ghjente in Parigi chì si n'anu da serve, puru per andà à contrasensu per raportu à e nostre dumande.

Dunque vi ramentu dinù chì pè u mumentu ùn ci hè statu pusizione publicada a parte di u primu ministru o di u ministru Rebsamen incaricatu, à titulu di u so dicretu d'attribuzione, a ramentu, di a quistione istituzionale di a Corsica, vale à dì chì u ministru Rebsamen hà a manu nantu à u cartulare glubale. Da ch'ellu sarà venutu in Corsica per parlà di a manera ch'ellu vede e cose, u vidaremu è s'è vo vulete u vidaremu insieme, tutti insieme, puru per pone una volta di più, a quistione glubale ch'è vo trattate in a vostra quistione è soprattuttu per ottene risposte chjare, efficace è rapide.